



N°7719  
Entrée le 07.03.2023  
Chambre des Députés  
Déclarée recevable  
Président de la Chambre des Députés  
(s.) Fernand Etgen  
Luxembourg, le 07.03.2023

Groupe parlementaire

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, de 7. Mäerz 2023

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Justizminister weiderzeleeden.

De Centre socio-éducatif de l'État (CSEE), deen sech ëm Jugendlecher këmmert, déi dacks mam Gesetz a Konflikt geroden, verdeelt sech méttlerweil op dräi Sitten am Land. Engersäits ass gewosst, datt dës Strukturen iwweffëllt sinn an um Limitt schaffen.

Doriwwer eraus wier - eisen Informatiounen no - d'Situatioun an der UNISEC katastrofal, vill Jugendlecher géinge maachen, wat se wëllen an dat quasi ouni Konsequenzen. Donieft heescht et, datt der Police an der Justiz d'Hänn gebonne wieren.

An deem Kontext wéilt ech der Madamm Justizministesch gär folgend Froe stellen:

1. Wéi vill Prozent vun de Jugendlechen, déi an de Structure vum CSEE ënnerbruecht sinn, si bis dato nach net mam Gesetz a Konflikt geroden?
2. An engem Zeitungsartikel heescht et, den Direkter vun der CSEE hätt sech esou geäussert, datt mat Bléck op d'Nationalitéite vun de Jonken an de Strukturen d'Verdeelung esou wier, wéi an der Gesellschaft. Eisen Informatiounen no stëmmt dat net. Kann d'Madamm Minister mir soen, wéi eng Nationalitéiten - an och opgeschlësselt no dem jeeeweilege Prozentsaz vun deenen eenzelen Nationalitéiten - an deene Structure vertraude sinn?
3. Wéi dacks gouf d'Police am Joer 2022 op Dräibuer an d'Structure vum CSEE, souwéi an d'Structure vun der UNISEC geruff? Wat waren - opgeschlësselt no de jeeeweilegen Asätz - d'Grënn, firwat d'Police geruff gouf?
4. Wéi dacks gouf d'Police vum 01.01.2023 bis elo op Dräibuer an d'Structure vum CSEE, souwéi an d'Structure vun der UNISEC geruff? Wat waren - opgeschlësselt no de jeeeweilegen Asätz - d'Grënn, firwat d'Police geruff gouf?
5. Wéi dacks goufe Policebeamten zënter dem Ufank vun 2022 bis elo vu Jugendlechen an de Structure vun der Unisec a vum CSEE ugegraff?

6. Laut eisen Informatiounen géingen an der UNISEC Drogen zirkuléieren. Wéi dacks sinn am Joer 2022 Droge konfiskéiert oder saiséiert ginn? Wéi dacks si säit 2023 Droge konfiskéiert oder saiséiert ginn?
7. Am Hibréck op déi - eisen Informatiounen no - katastrophen Situatioun an der UNISEC: Wéi eng Verbesserungen envisagéiert d'Madamm Ministesch?

Mat déiwem Respekt,



Fred Keup  
Deputéierten



**Gemeinsam Äntwert vum Minister fir Educatioun, Kanner a Jugend, Claude Meisch, vun der Justizministesch, Sam Tanson, a vum Minister fir bannenzeg Sécherheet, Henri Kox, op d'parlamentaresch Fro Nr. 7719 vum honorabelen Deputéierte Fred Keup**

**Ad 1)**

Den informatesche System vun de Justizautoritéiten erlaabt et net, e genaue Prozentsaz auszerechnen.

D'Majoritéit vun de Pensionnairen, déi 2022 am stationäre Beräich vum CSEE betreit gi sinn, haten op d'mannst eemol ee Verhalen un den Dag geluecht, deem dem Gesetz no enger Infraktioun entsprach huet. Et sief prezisiéiert, datt e Verstouss géint e Gesetz net onbedéngt de Grond ass, firwat e Jugendlechen am CSEE ënnerkënn.

**Ad 2)**

Et ergëtt sech folgend Opdeelung vun den Nationalitéite vun de Pensionnairen, déi op d'mannst een Dag am Laf vum Joer 2022 am CSEE am stationäre Beräich opgeholl goufen:

Nationalitéit	%
Lëtzebuerger	42,61
Staatsbierger aus engem Land aus der Europäescher Unioun	27,83
Staatsbierger aus engem Land ausserhalb vun der Europäescher Unioun	22,60
onbekannt	6,96

**Ad 3) – 6)**

Mir verweisen op d'Äntwert op d'parlamentaresch Fro Nr. 5972 vum 22. Abrëll 2022 vum honorabelen Deputéierte Fred Keup an op d'parlamentaresch Fro Nr. 7479 vum 17. Januar 2023 vun den honorabelen Deputéierten Octavie Modert a Léon Gloden.

D'Datebanke vun der Police erméiglechen et net eng automatiséiert Recherche op d'Virfäll déi sech exklusiv op d'Structure vum CSEE oder der UNISEC bezéien, ze maachen. Bei dëser automatiséierter Recherche géifen all Policeinterventiounen an all Virfäll déi ronderëm respektiv an der Lokalitéit Dräibuer geschitt wäeren, ugewise ginn.

**Ad 7)**

Wann d'Gesetzesprojeten Nr. 7991 iwwert d'Aféiere vun engem Jugendstrofrecht an Nr. 7994 iwwert d'Assistance, d'Ënnerstëtzung an de Schutz vu Kanner, jonken Erwuessenen a Familljen, gestëmmt sinn, wäert d'UNISEC en tant que telle net méi existéieren. Amplaz ass et virgesinn, eng adequat a spezialiséiert Struktur fir stroffälleg Jugendlecher ze bauen.

Lëtzebuerg, den 18. Abrëll 2023

De Minister fir Educatioun,  
Kanner a Jugend

(s.) Claude MEISCH